

Na Kipru sahranjen Rauf Denktash

17 Jan 2012 Izmijenjeno 18:10 CET

Na sjevernom dijelu otoka proglašena je trodnevna žalost, pošto je bivši lider kiparskih Turaka bio osnivač samoproglashene države Turska republika sjeverni Kipar



U prisustvu predsjednika Turske, premijera i članova vlade, kao i lidera opozicionih partija, u turskom dijelu Nikozije u ponedjeljak je sahranjen bivši lider kiparskih Turaka Rauf Denktash, koga su Grci na otoku doživljavali kao glavnu prepreku ujedinjenju Kipra.



Rauf Denktash [EPA]

Na sjevernom dijelu otoka proglašena je trodnevna žalost, pošto je Denktash (88) bio osnivač samoproglashene države Turska republika sjeverni Kipar, koju je do sada priznala samo Ankara. "On je historijska ličnost", kažu kiparski Turci, dok ga Grci optužuju da je bio "glavni zagovornik podjele otoka". Pregovori o ponovnom ujedinjenju Kipra, koji je podijeljen poslije turske vojne intervencije 1974. godine, već godinama se vode pod pokroviteljstvom Ujedinjenih naroda (UN), ali još nije napravljen vidljiviji napredak.

Generalni sekretar Svjetske organizacije Ban Ki-moon će se krajem mjeseca u New Yorku ponovo sastati s liderima dviju zajednica - Demitrisom Kristofijasom i Dervishom Erogluom - u novom pokušaju da približi dvije strane koje ne mogu naći zajednički jezik o podjeli nadležnosti buduće zajedničke države i povraćaju ogromne grčke imovine.

Izvor: Al Jazeera